

# Bréf frá Símoni Pétri

## Fyrsti kafli

<sup>1</sup> Frá Símoni Pétri, skuldaþræl og sendiboða Jesú Krists.

Til þeirra sem hafa meðtekið sömu trú og við, fyrir réttlæti Guðs og bjargvætts okkar, Jesú Krists.

<sup>2</sup> Megi miskunnsemi og friður margfaldast meðal ykkar í gegnum þekkingu á Guði og á Jesú, herra okkar. <sup>3</sup> Því hans guðlegi kraftur hefur gefið okkur allt það sem við þurfum til að lifa guðræknu lífi í gegnum sanna þekkingu á honum sem kallaði okkur með sinni eigin dýrð og gæsku.

<sup>4</sup> Í gegnum þetta hefur hann gefið okkur stór og dýrmæt loforð, svo að í gegnum þau getum við tekið þátt í hinni guðlegu náttúru, hafandi flúið spillingu heimsins sem vondur vilji hefur skapað.

<sup>5</sup> Einmitt vegna þessa skuluð þið gera allt sem í ykkar valdi stendur til að bæta við trú ykkar góðmennsku, við góðmennskuna þekkingu, <sup>6</sup> við þekkinguna sjálfsstjórn, við sjálfsstjórnina þolgæði, við þolgæðið guðrækni, <sup>7</sup> við guðræknina systkinaelsku og við systkinaelskuna kærleika.

<sup>8</sup> Ef þið hafið þessa eiginleika og þeir fara vaxandi í ykkur, munuð þið ekki vera án gagns eða ávaxta í sannri þekkingu á herra okkar Jesú Kristi.

<sup>9</sup> Því þau sem vantar þessa eiginleika eru skammsýn og hafa gleymt hreinsuninni frá sínum gömlu syndum.

<sup>10</sup> Þannig, kæru trúarsystkin, verið enn meira vakandi til að festa ykkur köllun hans sem útvaldi ykkur, því þau sem stunda þetta munu ekki hrasa. <sup>11</sup> Stundið þetta og þá munu standa ykkur opnar, dyrnar inn í eilífa konungsríki Jesú Krists.

<sup>12</sup> Þessvegna mun ég alltaf vera tilbúinn að minna ykkur á þetta, þó þið þekkið þessa hluti nú þegar og stundið þá í þeim sannleika sem ykkur hefur verið gefinn.

<sup>13</sup> Mér þykir það rétt svo lengi sem ég er í þessari jarðnesku vist, vitandi að innan skamms mun ég fara héðan, eins og Jesú Kristur hefur opinberað mér.

<sup>15</sup> Ég vil líka að þið getið rifjað þessa hluti upp þegar ég verð farinn.

<sup>16</sup> Við deildum ekki með ykkur upplognum goðsögum þegar við sögðum ykkur frá krafti og komu Jesú Krists, heldur vorum við vitni að hátign hans <sup>17</sup> þegar hann meðtók dýrð og heiður frá Guði föður þegar hann sagði með sinni stórkostlegu dýrð „Þetta er sonur minn sem ég elska, ég er ánægður með hann“. <sup>18</sup> Við heyrðum þessi orð koma af himnum með okkar eigin eyrum þegar við stóðum á heilaga fjallinu með Jesú.

<sup>19</sup> Við höfum líka spádómana, við getum treyst þeim og það er gott að grandskoða þá, þeir eru eins og skært ljós á dimmum stað, þartil það kemur dagur og morgunstjarnan rís í hjörtum okkar. <sup>20</sup> Ennfremur verðið þið að skilja að enginn

spádómur kom úr túlkun spámanna sem skrifuðu þá, <sup>21</sup> því enginn spádómur á sér upphaf í mennskum vilja heldur töluðu spámennirnir frá Guði í gegnum heilagan anda.

## Annar kafli

<sup>1</sup> En þá eins og nú komu fram falsspámennt og falskennarar meðal fólksins, sem með leynd læða inn hættulegum villukenningum, jafnvel afneita herranum sem keypti þá. Það mun kalla yfir þá eyðileggingu.

<sup>2</sup> Margt fólk mun elta ólífnaðinn og vegna þeirra mun sannleikurinn verða afskræmdur <sup>3</sup> og með græðgi sinni munu þeir féfletta ykkur með ósönnum orðum. Þeirra dómur er löngu ákveðinn og verður ekki stöðvaður, þeir munu mæta eyðileggingu sinni. <sup>4</sup> Því ef Guð þyrmdi ekki englunum þegar þeir syndguðu, heldur kastaði þeim í undirdjúpið og heldur þeim í myrkum pytti þartil dómur fellur, <sup>5</sup> og þyrmdi heldur ekki gamla heiminum heldur drekkti honum, en bjargaði Nóa, boðbera réttlætisins, ásamt sjö öðrum; <sup>6</sup> fyrst hann dæmdi borgirnar Sódómu og Gómorru til að brenna til ösku, til að sýna hvað hinir óguðræknu eiga von á, <sup>7</sup> og ef hann bjargaði hinum réttláta Lot, <sup>8</sup> sem kvaldist, búandi innan um svall þeirra og saurlífi; <sup>9</sup> þá veit Guð hvernig bjarga á hinum guðræknu frá freistingum og hvernig á að refsa hinum óréttlátu á dómsdegi. <sup>10</sup> Sérstaklega þeim sem láta undan fýsnum líkamans og hlýða engu. Gangandi óttalaust um í eigin vilja, bölvandi hæstu tignum eins og það sé ekkert. <sup>11</sup> Sjálfir englarnir, sem eru þeim miklu fremri, bölvu þessum tignum ekki einu sinni þegar þær eru ákærðar fyrir Drottni. <sup>12</sup> Þetta fólk fer með guðlast sem það skilur ekki. Það er eins og skynlaus dýr sem stjórnast af eðlisávisun og fæðast til þess eins að vera veidd og farast. Þetta fólk mun líka farast eins og dýrin. <sup>13</sup> Uppskeyra vont fyrir það vonða sem það sáði. Þessu fólk finnst það munaður að svalla að degi til og eru smánarblettur á hátíðum ykkar. <sup>14</sup> Þau hafa augu full af hórdómi og hætta aldrei að syndga og draga óstyrkar sálir niður í svaðið með sér. Ágirndin er sérgrein þeirra. <sup>15</sup> Þau hafa farið af beina veginum og ráfað á eftir Bílam Bósorsyni, sem elskaði peningana sem hann fékk fyrir að gera rangt. <sup>16</sup> En múlasni leiðrétti hann, dýr sem getur ekki talað, talaði með mannsrödd og stöðvaði brjálæði spámannsins. <sup>17</sup> Þetta fólk er mistur í stormi og lindir án vatns. Svartasta myrkrið er frátekið fyrir það. <sup>18</sup> Það hefur uppi galtóm, hrokafull orð og með því að höfða til girnda líkamans tæla þau fólk sem er nýsloppið frá því að velja illt. <sup>19</sup> Þau lofa frelsi, en eru sjálf þrælar spillingar, enda er fólk þrælar þess sem sigrar það. <sup>20</sup> Ef þau hafa flúið spillingu heimsins með því að kynnast Jesú Kristi, bjargvætti okkar, og eru svo aftur flækt í spillingarvefinn, eru þau verr sett en í upphafi. <sup>21</sup> Þá hefði verið skárri fyrir þau að hafa ekki kynnst rétta veginum, frekar en að kynnast honum og snúa svo baki við heilaga orðinu sem þeim var gefið.

<sup>22</sup> Um slíkt fólk segja Orðskviðirnir „Hundurinn snýr aftur í eigin ælu. Eftir þvott snýr gyltan aftur í sama skítinn“.

## Þriðji kafli

<sup>1</sup> Kæru vinir, þetta er annað bréfið mitt til ykkar. Ég skrifaði þau bæði til að hvetja ykkur til að stunda heilbrigða hugsun.

<sup>2</sup> Ég vil að þið munið eftir spádómsorðunum og boðorðinu sem þið fenguð frá herra okkar og bjargvætti í gegnum sendiboðana.

<sup>3</sup> Umfram allt skuluð þið muna að á síðustu dögum þessa heims munu koma fram háðfuglar eltandi eigin girndir, sem munu segja <sup>4</sup> „Hvar er þessi endurkoma sem hann lofaði? Allt líf gengur sinn vanagang og ekkert bolar á honum!“

<sup>5</sup> En þeir viljandi gleyma að fyrir löngu sagði Guð orð og alheimurinn varð til. Og Guð sagði orð og jörðin varð til úr vatni, af vatni. <sup>6</sup> Sama vatni og gjöreyddi síðar öllu á jörðinni. <sup>7</sup> Með orði hans er eldur frátekinn fyrir núverandi himinn og jörð, eldurinn bíður dómsdagsins og eyðingu hinna óguðlegu.

<sup>8</sup> Og gleymið þessu ekki kæru vinir að fyrir Guði eru þúsund ár eins og dagur og dagur eins og þúsund ár. <sup>9</sup> Guð er ekki seinn að uppfylla loforð sín heldur er hann þolinmóður við okkur. Hann vill ekki að nein manneskja glatist heldur að allt fólk iðrist og geri betrun.

<sup>10</sup> En dagur Drottins mun koma eins og þjófur á nóttu. Himnarnir munu hverfa með öskri, frumefnin munu eyðast í eldi og jörðin, og allt sem á henni er, mun brenna upp. <sup>11</sup> Þar sem allt mun eyðast á þennan hátt, hvernig ættir þú þá að vera? Þú ættir að lifa góðu og guðræknu lífi <sup>12</sup> á meðan þú bíður eftir og flýtir fyrir degi Guðs sem mun brenna upp himnana og bræða frumefnin með ofsafengnum hita.

<sup>13</sup> Samkvæmt loforði hans erum við að bíða eftir nýjum himni og nýrri jörð þar sem réttlætið mun ríkja.

<sup>14</sup> Þannig að kæru vinir, nú hafið þið verið vöruð við og verið því vakandi svo þið sogist ekki inn í villu lögleysisins og fallið þar með úr ykkar öruggu stöðu <sup>18</sup> heldur vaxið í góðvild og þekkingu á herra okkar og bjargvætti, Jesú Kristi.

Hans sé dýrðin núna og til eilíðar.

Amen.